



Editorial

Redacción

Un ano máis sae á luz a nova edición da nosa revista con motivo do X Encontro de Embarcacións Tradicionais en Bueu. Foi un ano de ausencias e de novas adquisicións, ¡como a vida mesma!

Inmersos na nosa tarefa de divulgación do patrimonio marítimo, ademais da importancia que damos ao mar, entendido como medio de traballo e de lecer, queremos resaltar tamén o valor da vila en si e da súa riqueza cultural e paisaxística, rescatando da historia un artigo dun desembarco pirata na Pedra Branca ou unha estadía na vila de Rómulo Gallegos. Todos estes sinais dan mostra da identidade mariñeira da vila, aos que non queremos amarrarnos, pero tampouco esquecer.

Ao redor do mar erguéronse en Bueu construcións como: estaleiros, atadores, salazóns, fábricas conserveiras, lonxa, praza,... Mais o tempo pasa e a realidade transfórmase, evoluciona para ben ou para mal, pero non volve atrás nin se detén.

As praias desaparecen, os peiraos medran, o mar contáminase, a pesca escasea, as embarcacións e as artes tamén varían e a carpintería de ribeira vai camiño dos museos.

¿Que tipo de vila queremos deixar en herdanza aos nosos fillos?

Poida que sexa normal que nós, gardas custodiadores dun inmenso patrimonio marítimo, miremos con bos ollos a conservación de toda esa identidade mariñeira que nos arroulou. E do mesmo xeito que defendemos a rehabilitación do asteleiro de Purro (cando, como e onde deberá pasar por un consensuado debate), avogariamos tamén pola recuperación dunha fábrica de salazón.

Tamén nós precisamos dos peiraos para amarrar os nosos barcos. Ten que haber peiraos, si, pero non a conta das praias. Ten que haber pesca, si, hoxe mañá e sempre que haxa vida. Ten que haber vida, si, e tamén museos que recollan a que xa pasou.

Dende esta Asociación estamos nunha posición privilexiada que nos permite facer un museo vivo grazas ás nosas embarcacións, a nosa escala de valores e a inestimable aportación das persoas e institucións que axudan a financiar estes proxectos.

E como todo cambia, nós queremos tamén dar un paso adiante con esta edición: a revista medra así como as nosas aspiracións. Hai un dito popular... "cada mastro que aguante a súa vela", e dende o equipo de redacción queremos facer da nosa vela un estandarte.

Oxalá esta revista sirva para deleitar a quen a lea e para estimular a quen queira iniciarse no abondoso mundo da navegación tradicional.

A todos: boa singradura.

